

欽  
定  
全  
唐  
文

欽定全唐文卷五百三十八目錄

裴度二

請釋王賞狀

不置冢宰議

寄李翱書

三藏無畏不空法師塔記

自題寫真贊

送毛翁述

蜀丞相諸葛武侯祠堂碑銘

并序

唐故太尉兼中書令西平郡王贈太師李公神道

碑銘

并序

劉府君神道碑銘

并序

欽定全唐文卷五百三十八

裴度二

請釋王賞狀

前懷州武德縣令王賞以失縣庫子賞乃盡償所欠緡錢  
庫子莫可得獄固難竟河陽節度使溫造嚴刻禁賞三年  
母老不得侍疾母亡不得服喪大理寺執文斷疏疑似之  
間冤滯深久

下缺

不置冢宰議

冢宰是殷周六官之首既掌邦理實統百司故王者諒闇

百官有權聽之制後代設官旣無此號不可虛設且國朝故事或置或否古今異制不必因循其諸司公事望請中書門下處分

寄李翱書

前者唐生至自滑猥辱致書札兼獲所貺新作二十篇度俗流也不盡窺見若愍女碑烈婦傳可以激清教義煥於史氏鐘銘謂以功伐名於器爲銘與弟正辭書謂文非一藝斯皆可謂救文之失廣文之用之文也甚善甚善然僕之知弟也未知其他直以弟敏於學而好於文也就六經

而正焉故每遇名輩稱弟不容於口自謂彌久益無愧詞  
竊料弟亦以直諒見待不以悅媚相容故不惟嗟悵亦欲  
商度其萬一耳若弟擯落今古脫遺經籍斯則如獻白豕  
何足採取若猶有祖述則願陳其梗槩以相參會耳愚謂  
三五之代上垂拱而無爲下不知其帝力其道漸被於天  
地萬物不可得而傳也夏殷之際聖賢相遇其文在於盛  
德大業又鮮可得而傳也厥後周公遭變仲尼不當世其  
文遺於冊府故可得而傳也於是作周孔之文荀孟之文  
左右周孔之文也理身理家理國理天下一日失之敗亂

至矣騷人之文發憤之文也雅多自賢頗有狂態相如子雲之文譎諫之文也別爲一家不是正氣賈誼之文化成之文也鋪陳帝王之道昭昭在目司馬遷之文財成之文也馳騁數千載若有餘力董仲舒劉向之文通儒之文也發明經術究極天人其實擅美一時流譽千載者多矣不足爲弟道焉然皆不詭其詞而詞自麗不異其理而理自新若夫典謨訓誥文言繫辭國風雅頌經聖人之筆削者則又至易也至直也雖大彌天地細入無間而奇言怪語未之或有意隨文而可見事隨意而可行此所謂文可文

非常文也其可文而文之何常之有俾後之作者有所裁  
準而請問於弟謂之何哉謂之不可非僕敢言謂之可也  
則大學之道在明明德在止至善矣能止於止乎若遂過  
之猶不及也觀弟近日製作大旨常以時世之文多偶對  
儷句屬綴風雲羈束聲韻爲文之病甚矣故以雄詞遠志  
一以矯之則是以文字爲意也且文者聖人假之以達其  
心達則已理窮則已非故高之下之詳之畧之也愚欲去  
彼取此則安步而不可及平居而不可踰又何必遠關經  
術然後騁其材力哉昔人有見小人之違道者恥與之同



形貌共衣服遂思倒置眉目反易冠帶以異也不知其倒之反之之非也雖非於小人亦異於君子矣故文人之異在氣格之高下思致之淺深不在其磔裂章句隳廢聲韻也人之異在風神之清濁心志之通塞不在於倒置眉目反易冠帶也試用高明少納庸妄若以爲未幸不以苦言見革其惑唯僕心慮荒散百事罷息然意之所在敢隱於故人耶昌黎韓愈僕識之舊矣中心愛之不覺驚賞然其人信美材也近或聞諸儕類云恃其絕足往往奔放不以文立制而以文爲戲可矣乎可矣乎今之作者不及則已

及之者當大爲防焉耳弟素居多年勞想深至窮陰凝沍  
動息如何入奉晨昏之歡出參帷幄之畫固多適耳昨弟  
來字欲度及時干進度昔歲取名不敢自高今孤莞若此  
遊宦謂何是不復能從故人之所勗耳但實力田園省過  
朝夕而已然待春氣微和農事未動或當策蹇謁賢大夫  
兼與弟道舊未爾間猶希尺牘珍重珍重力書無餘從表  
兄裴度奉簡

三藏無畏不空法師塔記

大唐開元二十三年三藏無畏卒春秋九十有九詔鴻臚

承李現監護喪事塔於龍門之西山廣化寺藏其全身畏  
本釋種甘露飯王之後以讓國出家道德名稱爲天竺之  
冠所至講法必有異相初在烏茶國演遮那經須臾衆會  
咸見空中有毘盧遮那四金字各尋丈排列久之而沒又  
嘗過龍河一托駝負經沒水畏懼失經遽隨之入水於是  
龍王邀之入宮講法不許彼請堅至爲留三宿而出所載  
梵夾不濕一字其神異多類此

自題寫真贊

爾才不長爾貌不揚胡爲將胡爲相一點靈臺丹青莫狀

送毛仙翁述

爰自荊州鼎成黃金道息封固真粹教不流傳代歷秦漢  
言者怪濶先儒以爲繫風捕影誰抵其實瑯琊論衡詳之  
矣予嘗以爲斯言之未盡其臧否也及見仙翁勃違前聞  
且嗇神胎元抱和含真穆然道風煦然如春追駐穉色將  
數百歲光陰自駛寒暑不易鑪鎚間之物無不化養之在  
我得之自然加以熊經鳥伸元藏城府閉合默識孰窺崇  
壝當今勢位壓山河器業橫覆載北面嚮傾就誠屈乎辭  
度不知先儒誰談其無得食馬肝者豈爲知味耶圖鬼神

者易爲工耶不復知總總化胎而已仙翁將去追遺雲蹤  
苟非造物者不能以識

蜀丞相諸葛武侯祠堂碑銘

并序

度嘗讀舊史詳求往哲或秉事君之節無開國之才得立  
身之道無治人之術四者備矣兼而行之則蜀丞相諸葛  
公其人也公本系在簡策大名蓋天地不復以云當漢祚  
衰陵人心競逐取威定霸者求賢如不及藏器在身者擇  
主而後動公是時也躬耕南陽自比管樂我未從虎時稱  
卧龍詩曰潛雖伏矣亦孔之炤故州平心與元直神交洎

乎三顧而許以驅馳一言而定其機勢繇是翼扶劉氏纘  
承舊服結吳抗魏擁蜀稱漢刑政達於荒外道化行乎域  
中誰謂阻深殷爲強國誰謂遼脆勵爲勁兵則知地無常  
形人無常性自我而作若金在鎔故九州之地魏有其七  
我無其一由僻陋而啟雄圖出封疆以延大敵財用足而  
不曰浚我以生干戈動而不曰殘人以逞其底定南方也  
不以力制而取其心服震疊諸夏也不敢角其勝負而止  
候其存亡法加於人也雖死徙而無怨德及於人也雖奕  
葉而見思此所謂精義入神自誠而明者矣若其人存其

政舉則四海可平五服可傾而陳壽之評未極其能事崔  
浩之說又詰其成功此皆以變詐之畧論節制之師以進  
取之方語化成之道不其謬歟夫委棄荊州不能遂有三  
郡此乃務增德以吞宇宙不黷武以爭尋常及出斜谷據  
武功分兵屯田爲久駐之計與敵對壘待可勝之期雜乎  
居人如適虛邑彼則喪氣我方養威若天假之年則繼大  
漢之祀成先主之志不難矣且權傾一國聲震八紘而上  
下無異詞始終無愧色苟非運膺五百道冠生知曷以臻  
於此乎故元德知人之明者倚杖曰魚之有水仲達姦人

之雄者嗟稱曰天下奇才度每述其行事度其遠心願奮短札以排羣議而文字蚩鄙志願未果元和二年冬十月聖上以西南奧區寇亂餘孽罷吐未息汙俗未清輟我股肱爲之父母乃詔相國臨淮公由秉鈞之重乘推轂之寄戎軒乃降藩服乃理將明帝道陬落綏懷溥暢仁風閭閻滋殖府中無留事宇下無棄才人知嚮方我有餘地則諸葛公在昔之治與相國當今之政異代而同塵矣度謬以庸薄獲參管記隨旌旄而爰止望祠宇而修謁有儀可象以赫厥靈雖徽烈不忘而碑表未立古者或拳拳一善或



師長一城尚流斯文以示來裔況如仁之歎終古不絕其  
可闕乎乃刻貞石庶此都之人存必拜之感云爾銘曰

昔在先主思啟疆宇擾攘靡依英雄無輔爰得武侯先定  
蜀土道德城池禮義干櫓煦物如春化人如神勞而不怨  
用之有倫柔服蠻落鋪敦渭濱攝跡畏威雜居懷仁中原  
盱食不測不克以待可勝允臻其極天未悔禍公命不果  
漢祚其亡將星中墮反旗鳴鼓猶走司馬死而可作當小  
天下尚父作周阿衡佐商兼齊管晏總漢蕭張易代而生  
易地而理遭遇豐約亦皆然矣嗚呼奇謀奮發美志天遏

吁嗟嚴立咸受謫罰聞之痛之或泣或絕甘棠勿翦駢邑  
斯奪繇是而言殊途共轍本於忠恕孰不感悅苟非誠慤  
徒云固結古栢森森遺廟沈沈不殄禋祀以迄於今靡不  
駿奔若有照臨蜀國之風蜀人之心錦江清波玉壘峻岑  
入海際天如公德音

唐故太尉兼中書令西平郡王贈太師李公神道

碑銘

并序

惟天錫成命於我唐保茲國祚生此人傑則西平王李公  
其是乎不然何覆暴如風振槁葉戴君若鰲冠靈山橫流

之中一匡而定公諱晟字良器其先隴西人也後徙京兆  
曾祖嵩皇岷州刺史贈洮州刺史祖思恭皇洮州刺史贈  
幽州大都督考欽皇左金吾衛大將軍隴右節度經畧副  
使贈太子太保代有名跡雄於西土公幼好學學不爲人  
及讀呂張孫吳之書慨然有經邦濟物之志未弱冠遊秦  
涼間元侯宿將見者咸器異之乾元初嘗客武都值酋豪  
以缺守遘亂殺掠平人公與所從十數騎馳而射之殪其  
爲魁者餘黨遂遁寇所虜獲積如邱山公一無所取惟椎  
牛醢酒享士而去邦人感服具以狀聞特拜左清道率飾

以金紫將朝京師自獻方畧屬裔夷紛擾有土急賢河隴  
將帥相繼表用厯二府右職所至常以才謀爲其委重累  
遷至光祿太常卿階爵在第一品涇原四鎮北庭節度都  
知兵馬使四面都遊奕使懸識虜態周知地形應變不窮  
有奪有待驥驟庭而莫展雲出岫而斯飛代宗徵之以左  
金吾衛將軍爲神策軍兵馬使屬羌蠻犯蜀朝廷濟師命  
公督禁旅絕棧道而往救焉公銜枚過險出賊不意連下  
堅壁遂誅首惡還授檢校太子賓客且復舊職建中二年  
田悅以魏叛德宗極意致討悉起徂征以公爲神策先鋒

都知兵馬使加御史中丞與河東河南等道諸軍合擊公  
濟河而行能以眾正及破洹水陣解臨洺圍轢魏屬城抵  
燕通邑其摧鋒屺銳皆先羣帥而寘力焉遙拜左散騎常  
侍兼御史大夫厥功未成聞賊泚肆虐皇居失守西嚮慟  
哭載馳載驅行及代北授檢校工部尚書充神策行營節  
度公提孤軍募散卒拊循訓勵以達行在值懷光中叛大  
駕再遷加檢校右僕射餘如故尋轉左僕射同平章事兼  
京兆尹神策軍京畿鄜坊節度觀察等使管內及商華等  
州副元帥公固守渭城決平秦壘調食制用先發我私捐

甘攻苦皆自我始每一言一誓聲淚俱發勇夫義士感而使之蔑不濟矣時自雍而東延於汝洛震於河汴所在征鎮亂畧相從公介巨盜之間使聲援斷絕立成師之法致號令嚴肅蒐捕十旬指揮一舉乘墉壑以通軌道磔梟獍以清宮禁俾九市三條無輟肆之驚無秋毫之犯羽書速告鑾輅爰歸廓氛祲爲祥光攄憂憤爲喜氣詩曰允矣君子展也大成斯之謂歟考古視今論功稱忠者多矣若至危而安至難而易卓犖跨邁如公莫儔拜司徒兼中書令俄以凶孽甫寧邊防猶警岐下任重乃以本官兼鳳翔尹

鳳翔隴右節度觀察等使及四鎮北庭涇原等州副元帥  
改封西平郡王加食邑實封至一千五百戶公名懾戎王  
政和藩部始至而生植少安而訓齊逮四載賦輿十倍其  
初會課入輔拜太尉中樞如故人或謂公勲望已高寵渥  
已極宜從容頤養稍稍遜避公曰不然人臣外則盡力內  
則盡心若止偷榮孰爲且哲故每承帷幄之問則言弗無  
隱理奪不回大指以東夏可平西陲可復或已行而事終  
不顯或未用而身遽不遺以貞元九年八月四日薨於位  
春秋六十有七德宗撫几哭於別次自都邑達關畿無士

庶無老幼皆發哀相弔則曩時戢兵安人之德可謂浹於  
元元之骨髓矣冊贈太師賻賵加等以其年十二月十六  
日葬於高陵縣奉正原鄭國夫人杜氏祔焉自捐寢至安  
宅皆所司辦護中貴反覆萬情所奉如不及焉嗚呼以公  
之靜難扶傾不言所利雖存歿極位始終殊禮而天意若  
曰其福享未至故迤延於後有子曰愿故檢校司空河中  
節度等使贈司徒五列雄鎮三爲上公曰聰故光祿寺主  
簿曰總故太子中允贈兵部郎中曰憇左神武軍大將軍  
兼御史大夫曰憑故右威衛大將軍兼御史中丞贈洪州



都督曰恕故光祿卿贈右散騎常侍曰憲檢校左散騎常侍領南節度觀察等使兼御史大夫進因貴胄達以善政曰愬故檢校左僕射同中書門下平章事贈太尉克廣前修仍執醜虜曰懿故渭南縣尉曰聽檢校司徒義成軍節度觀察等使統戎按俗是以似之曰基右羽林軍將軍曰愬嵐州刺史並地勢吏用兼而有焉粵太和元年秋七月聽拜疏上言以公之徽烈則御製碑文於渭川矣以公之風度則詔命圖形於雲臺矣唯大其邱隴鬱彼松檟望有祁山之象拜無峴首之碑將刊貞石式表幽隧乃命臣度

稱伐言詩其詞曰

建中季年大盜忽焉皇輿避狄狩於梁川顧謂太師汝才  
汝畧將威致討必殄寇虐太師泣奉捐軀誓衆度其成城  
可以利用赫矣鋪敦傳於墻垣手搏足躋如衝如援一鼓  
而破一麾而奔掃清宮闈刷盪妖昏我師莅止我令行矣  
都人不知已事方喜飛章告慶飭駕言旋鴻烈耀古謹聲  
動天車服之錫河山之誓九命而俯一心若厲俾侯於岐  
阜安邊陲藩政旣成袞職攸宜嶽降帝賚矢言詭詞我后  
嘉猷我躬何爲道直氣和勞謙終吉福履所綏未享萬一

上天不惠厚宥遄歸垂裕流光用延恩暉翼子肥家將壇  
台席繼立奇功代傳休績聽與伯仲永懷高蹤請於朝廷  
表是邱封帝曰孝哉胡可不從宣我祖之不業繫爾父之  
嘉庸乃詔作銘以觀億齡

劉府君神道碑銘

并序

公諱太真字仲適族彭城晉永嘉末衣冠南渡遂爲金陵  
人一代祖悱隋伏波將軍桂陽太守高祖關皇襄州別駕  
曾祖軫皇沂州刺史祖際皇洪州錄事參軍考若筠皇贈  
諫議大夫蹈道輕世爲儒澡身慶流後昆追榮幽壤公十

有五而志於學弱冠以行義修潔詞藻瑰異名聲藉甚於  
諸公間當時文士蘭陵蕭茂挺才高意廣誘接甚寡一見  
公便延之座右以孔門高第不在茲乎天寶中與伯氏太  
冲迭昇太常第議者榮之屬被虐虜包禍中原俶擾潛心  
墳素退跡村廬樂以忘貧安乎終養至廣德二年江淮宣  
慰使御史大夫李公季卿薦授左衛兵曹永泰二年河內  
副元帥太尉李公弼聞風加禮致望參贊除大理評事辟  
書詔命疊至里門初感招弓之遇猶懷捧檄之惠及沂淮  
而北稍遠家庭以干戈未弭亂離斯瘼倘貽憂於一夕又

焉用乎三牲迺飛咫尺之書布方寸之心而理歸悼李公  
初甚遲之迄用嗟悼諫議府君嘗被熱疾而爲疽醫者之  
言手不可觸公迺自吮至於良已則劉璫之藥漬指傷胡  
可比也後因與元兄營甘鮮之膳自城邑而歸未至所舍  
而遇曛黑則有偷者引弓遮道公遽告之名居且曰身惟  
所取無害吾兄盜者迺愕然自失曰不謂是劉家兄弟迺  
慚而退則趙孝之爭死讓生不是過也故宗族稱孝焉鄉  
黨稱悌焉浙西觀察使御史大夫李公栖筠聞之表爲常  
熟令公以爲入則安親出則養人斯可矣旣到官不逾歲

而一邑自化未幾再罹家禍烏鳥之歎若此齊斬之哀何  
極除服浙東觀察使陳少遊虛右職而勤請焉公以陳之  
鎮宣城也實厚於諫議府君歲時禮遺不絕於道迺從之  
奏授監察御史及陳之移鎮揚州又爲節度判官再遷至  
侍御史正違理煩不負知者德宗皇帝卽位徵拜起居郎  
載筆丹陛休風藹然改尚書司勳員外郎尋轉吏部員外  
郎綜覈流品練達程式藏奸立見析滯如流名著南宮望  
歸西掖遷駕部郎中知制誥煥發人文昭宣帝命典謨載  
暉於紫闥諷議獨立於清朝以稱職賜緋魚袋建中四年

夏正授中書舍人是冬狂寇竊發乘輿薄狩奔走陪扈遑  
恤其家興元反正拜工部侍郎屬兩河兵旱徭費騷然慎  
選名臣往勞來之迺召入內殿親承中旨德宗嘉之遂賜  
金紫充河東澤潞恒冀易定等道賑給宣慰使是行也將  
之明之陰雨膏之與山甫召伯同具歌詩矣貞元元年轉  
刑部侍郎詳刑議獄無復煩累改祕書監遺編脫簡有以  
刊正三年拜禮部侍郎天下賓王之士尚實遠名者竊相  
賀矣秉公心而排羣議履正道而杜私門以爲聳善興能  
試言考藝若求虛譽護小嫌是全身之計非取士之方也

迺貶抑浮僞仍歲不回適值時棟變更朝柄奪移怒不在  
公而及於公矣遂因囂囂之口成是貝錦出爲信州刺史  
求仁得仁不以屑意則下惠焉往而不黜子文三已而無  
愠者於是信焉亦旣按部風行化洽勞罷者息離散者來  
易簡政成剽輕俗革官刑不用闔境熙熙嗚呼黃霸未徵  
於潁川賈誼不聞於宣室移疾去郡以貞元八年三月八  
日薨於餘干縣之旅館春秋六十八朝廷遂亡其宿重士  
子俄失於津涂故哭於寢喪於心者寄聲相弔其慟也極  
嗣子諷祇服嚴訓可謂成人銜哀致毀幾於越禮以言歸



兆域未叶著龜權窆於丹陽縣之別墅至貞元十八年十月十九日方從理命克葬於宣城郡溧水縣方墟之古原夫人趙郡郡君李氏皇許州刺史崇儉之孫皇申州羅山縣令遐之女昔之嬪則今也母儀以諷從事於浙東連帥府授試金吾衛倉曹參軍學由斷織祿可供贍不幸又天謂之何哉孤孫曰祐僅毀齒矣夫人撫視而哭無時非不知短長之命也其所哭者公之譖愬已消於覲見公之徽烈將示於來裔而高碑未刻良允繼沒於是門生之在朝廷者諫議大夫杜羔中書舍人裴度起居舍人盧士玫殿

中侍御史李修光祿少卿盧長卿右司郎中韋乾度工部  
員外郎李君何在藩牧者浙東觀察都團練使御史中丞  
李遜黔中觀察經畧使御史中丞李道古澤州刺史御史  
中丞盧頊嘉州刺史王良士復州刺史鄭羣沔州刺史嚴  
公弼慈州刺史劉元鼎其在幕府者侍御史田伯殷中侍  
御史盧璠馬逢監察御史馮魯楊巨源其在畿者櫟陽令  
麻仲容藍田丞崔立之盤厓尉麴澹等咸懷賞鑒自悼遺  
闕以爲沂川表德魯闕一生徒峴首銘闕一荆州僚吏况  
公忘家體國正心誠意厯位崇顯而惟欲下人應事該明

而未嘗矜已虛和善守廉儉好施至於開誘後學旌別羣才時皆見其獎之之過也而莫知其辨之之精也故始異論終共稱其爲實乎觀於今可知矣其爲名乎傳於後可必矣若不昇台座不及期頤將時邪命邪豈道至人不至邪如羔輩被蒙簡拔附麗牆宇樹之貞石貴此元扃匪報也永以爲泣拜之所焉爾銘曰

行高世兮才經國學以聚兮文以飾奉絲綸兮詒楷則宰賓貢兮宏鑒識人醜正兮我好直時風謬兮天聽側隼爲  
煥兮鵬對臆不俾屏兮長太息門下諸生憤何極惟有修

業爲報德德之馨兮間讒慝石之貞兮垂萬億



欽定全唐文卷五百三十九目錄

令狐楚

珠還合浦賦

漢皇竹宮望拜神光賦

授裴度彰義軍節度使制

授狄兼謨拾遺制

代鄭尚書賀登極表

賀南郊表

爲桂府王拱中丞賀南郊表

鄭尚書賀冊皇太后表

賀皇太子知軍國表

賀赦表

爲鄭尚書賀登極赦表

賀冊太子赦表

爲監軍賀赦表

中書門下賀赦表

賀德音表

代鄭尚書賀冊太后禮畢赦表

賀老人星見表

賀白鹿表

中書門下賀白野雞表

爲百官賀白鳥表

進張祜詩冊表

賀劍南奏破吐蕃表

賀靈武破吐蕃表

賀修八陵畢表

奉慰過山陵表





欽定全唐文卷五百三十九

令狐楚一

楚字殼士燉煌人自言十八學士德宗之裔貞元七年進士元和十四年累遷中書侍郎同平章事穆宗朝罷爲宣歙觀察使敬宗文宗朝歷宣武天平河東節度使大和七年入爲吏部尚書轉太常卿進左僕射封彭陽郡公開成元年拜山南西道節度使卒年七十二贈司空諡曰文子絢貴累贈至太尉

珠還合浦賦

以不貪爲寶神物自還爲韻 一作還珠亭賦

物之多兮珠爲珍通其貨而濟乎人纔披沙以晶耀俄錯  
彩以璘玢避無厭之心去之他境歸克儉之政還乎舊津  
由是觀德孰云無神相彼南州昔無廉吏富期潤屋貪以  
敗類孤漢主析圭之恩奪蒼梧易米之利濫源旣啟眞質  
斯闕從予舊而不瑕諒天眎今有自孟君來止惠政潛施  
欲不欲之欲爲無爲之爲不召其珠珠無脛而至不移其  
俗俗如影之隨爾其狀也上掩星彩遙迷月規粲粲離離  
與波逶迤乍入潭心時依浦口驚泉客之初泣疑馮夷之  
始剖依於仁里天亦何言富彼貪夫神之所不沙下兮泥

閒韜光而自閑映石華之皎皎雜魚目之鰥鰥豈比黃帝  
之使罔象元珠乃得蘭生之詭秦主荆玉斯還由是發潤  
洲蘋增輝岸草水容益媚澤氣彌好川實效珍地寧愛寶  
隱見諒合乎龍躍虧全非係乎蚌老豈惟彰太守之深仁  
所以表天子之至道觀夫杲耀外澈英華內含飾君之履  
兮豈不可照君之車兮豈不堪猶未遭於采拾尚見滯於  
江潭雖舊史之錄與前賢之談終思入掬以騰價願得書  
紳而勵貪於惟明時不貴異物徒飾表者招累而握珍者  
難屈是珍也居下流而委棄厯終歲而湮鬱望高鑒兮聞

投幸餘波之洗拂

漢皇竹宮望拜神光賦

以上辛之日有事於園丘爲韻

大事在祀吉日惟辛偉漢皇之光宅禮太乙之威神就陽  
位叙彝倫青旌旣載蒼璧斯陳帝德惟馨虔精誠而上感  
天道不昧發神光而下臻斯所以昭乎望拜之地肅爾侍  
祠之人懿茲珍神實曰靈貺奪月之魂韜雲之狀集於祠  
側照此壇上神實臨下以無私君亦當仁而不讓是時也  
神光未動遠靄初收天宇清而羣動和肅帝座正而萬靈  
懷柔倏爾電燵熠若星流謂珠蚌之初剖疑燭龍而暫游

武皇於是委玉佩俛翠旒自竹宮望園丘拜上帝之賜擁  
明神之休遐徵所聞以此爲異歌童不吳以奏曲從臣勿  
褻而在位奉其道永肩一心答其祥敢有二事光之降也  
帶燿火兮侵燎烟臨仙仗以增煥映靈丘而乍圓帝之望  
也爇香蕭兮奠元酒布清意而不倦儼威儀而方久善行  
無轍跡搏之乃無盛德有形容視之而有神旣格思人皆  
見之助逮暗之祭彰燭幽之時詎比夫望於觀臺而爲備  
坐彼宣室而受釐故能飛扇英聲騰乎茂實笑魯郊鼯鼠  
之告僭鄙秦祀野雞而獲吉來或從東似合序於春令至

常以夜若避明於朝日今國家成功巍乎明德依於鋪鴻  
猷而前王所羨崇嚴祀而左史宜書備禮告天帝旣踰於  
孝武觀光獻賦愚竊慕夫相如

授裴度彰義軍節度使制

門下輔弼之臣軍國是賴興化致理則秉鈞以居取威成  
功則分閫而出所以同君臣之體而一中外之任焉屬者  
問罪汝南致誅淮右蓋欲刷其汙俗弔彼頑人雖棄地求  
生者實繁有徒而嬰城執迷者未翦其類何獸困而猶鬪  
豈鳥窮之無歸歟由是遙聽鼓鼙更張琴瑟煩我台席董

茲戎旃朝議大夫守中書侍郎同中書門下平章事飛騎尉賜紫金魚袋裴度爲時降生協朕夢卜精辨宣力堅明納忠當軸而才謀老成運籌而智畧前定司其樞務備知四方之事付以兵要必得萬人之心是用禱於上元擇此吉日帶丞相之印綬所以尊其名賜諸侯之斧鉞所以重其命爾宜大布清問恢壯徽猷感勵連營蕩平多壘召懷孤疾字育夷傷況淮西一軍素效忠節過海赴難史策上勲建中初攻破襄陽擒滅崇義比者脅於兇逆歸命無由每念前勞常思安撫所以內輟佐輔爲之師帥實欲保全



慰喻使各得其宜爾往欽哉無越我不訓可守門下侍郎  
同中書門下平章事使持節蔡州諸軍事兼蔡州刺史充  
彰義軍節度管內度支營田使申光蔡等州觀察處置等  
使仍充淮西宣慰處置使散官勲如故

授狄兼謨拾遺制

朕聽政餘暇躬覽國書知奸臣擅權之由見母后竊位之  
事我國家神器大寶將遂傳於他人洪惟昊穹降鑒儲祉  
誕生仁傑保佑中宗使絕維更張明辟乃復宜福胄嗣與  
國無窮

代鄭尚書賀登極表

臣某言伏承皇帝光膺冊命踐登寶位率土臣子抃慶滋  
深中賀臣聞天子之孝以纂承爲重聖人之寶以傳授爲  
公伏惟皇帝陛下德合乾符道光天宇廓寰區以御厯灑  
渥澤而飛龍上以代太上之憂勤下以副羣生之欣戴溥  
傳天旨大洽人心喜氣騰輝晴雲動色黎元率舞將校傳  
呼卽日而萬姓歡康累旬而四海清謐臣職當統帥寄重  
方隅慶賀之誠倍萬常品限以所守不獲奔赴闕庭

賀南郊表

臣某言伏奉聖旨以來年正月五日朝獻太清宮饗太廟  
七日有事於南郊宜令所司準式者敬莫大於朝宗廟嚴  
莫大於饗郊丘此二帝三王與聖祖神宗之所以總百靈  
而臨萬國巍乎盛烈也伏惟皇帝陛下光膺大寶茂對上  
元盡誠信以奉先極婉愉而致養孝光夷貊悌達神明方  
將告成功敷顯號惟天爲大俾眾庶咸新如日之升與品  
物相見六幽傾耳四海翹首凡在臣下不勝慶幸而臣謬  
貞師律叨守戎藩不得捧豆邊於清廟之中執玉帛於泰  
壇之下仰觀盛禮伏賀鴻休聳踊轅門無任戀結屏營之

至謹遣某官某奉表陳賀以聞

爲桂府王拱中丞賀南郊表

臣某言伏奉十一月十日制書南郊大禮畢大赦天下者  
湛恩龐鴻大號渙汗際天接地孰不慶幸中賀臣聞禘嘗  
之禮所以仁祖禰也郊祀之儀所以尊天地也五帝之前  
蕡桴土鼓致其敬敬有餘矣而禮不足三王以降金罍玉  
斚備其禮禮有餘矣而敬不聞秦之增封也覬望神仙漢  
之郊丘也禳除災害雖無文而咸秩終有廢而莫舉猶可  
以編在方策垂其鴻名豈若國家參文質於六經之中陞

下酌損益於百代之後順昊天之成命得黎人之歡心九  
穀有年四方無事然後因吉土迎長日咸池屢舞太簇登  
歌萬靈識周旋之位百神知饗獻之節雲散而柴燎高達  
風清而蕭薌遠聞信大報之無私亦元鑒之不昧臣當時  
集軍將官吏僧道百姓等丁寧宣示訖惟天之意莫遺於  
細微如日之輝不隔於幽遠頑鈍知感鬼神懷柔何則刑  
莫大於成獄陛下捨之罪無輕重恩莫深於延賞陛下推  
之澤及存歿行道求志敢於直言者既許以親覽觸綸墨  
網屏於遠方者又移之近郊減來歲之新稅昭其儉也棄

比年之逋債宏諸仁也念勲臣而樹勲者益勸尊有德而不德者知慙賜羸老有粟帛之優禮神祇無牲幣之愛此所謂幽室盡曉枯條徧春雷雨作而蟄蟲昭蘇風雲行而籠鳥飛舞率土臣妾不勝大慶況臣蒙被恩澤獲齒生類會守遠郡阻窺盛禮徘徊天外目與心斷無任抃躍之心謹遣突將王清朝等奉表陳賀以聞

鄭尚書賀冊皇太后表

臣某言臣伏奉五月二十八日敕旨尊太上皇后恩覃日下歡動天中臣伏以皇太后坤德合符陰靈表慶化光宮

職道贊國風伏惟皇帝仁聖宅心文明恭已遵承孝理嚴奉慈顏獻寶綬於內朝宣玉冊於中禁彰明順德知陛下就養之勤表正母儀見陛下歸安之盛萬國所繫四方是刑人臣之懇願既申品物之歡心斯洽臣叨承寄任限守藩隅不及陪位闕庭抃舞稱賀無任聳慶踴悅之至

賀皇太子知軍國表

臣得上都進奉官狀報伏承七月二十八日詔旨軍國政事權令皇太子勾當者中賀伏惟皇帝陛下大明御寓至孝自天霜露旣濡想園陵之漸近雲霞是仰悲弓劍之方

遙內感深衷外勉庶政由是推赤心於俊乂委寶厯於元良宣明兩曜之光崇重萬國之本與夫游神姑射義豈同風養道大庭禮誠異日天下臣子不勝慶幸臣限以所守不獲拜候闕庭無任屏營之至

賀赦表

臣某言臣伏奉今月十一日制書元德融明聲聞於宗廟鴻名光大充塞於乾坤與物皆春大赦天下臣當時宣流渥澤騰布耿光恩均而萬物昭蘇慶洽而三軍鼓舞中賀臣聞覆載無私天地所以爲大德照臨不已日月所以爲



大明六位因時以成功一代觀象而設教肇自古昔垂爲  
憲章伏惟睿聖文武皇帝陛下並日而明配天爲大冠三  
皇之道宏十聖之風保合太和緝熙帝載是以廓清氛霧  
曾不累旬虔奉郊禋未嘗虛歲百蠻梯航以內面萬國歌  
舞而宅心所謂巍乎其有成功煥乎其有文章也尚復勞  
謙仄席勤恤納隍釋纍繫之幽囚無分輕重歸遐遠之放  
逐不問存亡棄逋債於窮人戒多求於貪吏憫朔邊之介  
士厚其寒衣恢武功也褒闕里之冑嗣賁以布帛振文教  
也推恩而九族旣睦行慶而六師用張忠貞必表於門閭

耆耄徧羞其牢醴百神咸秩一物不遺安人之所未安理  
人之所未理天波渙汗綸旨丁寧有以知天地覆載之仁  
有以見日月照臨之德天下臣妾不勝慶幸臣限守藩鎮  
不獲稱慶闕庭無任抃躍欣賀之至謹遣某官奉表陳賀  
以聞

爲鄭尚書賀登極赦表

臣某言伏奉二月二十四日制書大赦天下者霈澤自天  
鴻恩匝地三軍萬姓不勝慶躍臣聞天地至大或有所不  
容日月至明猶有所不照伏惟皇帝陛下體元繼統垂象

立極齊軒昊之元化冠唐虞之至仁敷大號於天中揭明  
謦於日下臣以爲覆載之德大於天地矣照臨之光明於  
日月矣何則用刀鋸而伏斧鑕者無重無輕陛下捨之投  
豺虎而禦魑魅者無遠無近陛下移之免逋逃獻畝之稅  
罷雕華任土之貢出後宮之伎樂還外國之俘囚褒崇首  
先於二王敦敘旁周於九族明徵義烈各錄其裔胄悉數  
忠勞遍增其爵級宣股肱之力者賞延於上効爪牙之任  
者賜出於中搜淪滯之才遷久次之秩聘士旣尊於經術  
問年必本於期頤在幽隱而不遺雖細微而皆及歡聲雷

動喜氣雲騰百姓知聖人之仁萬物覩聖人之作普天率土無不慶幸臣叨居藩服累沐恩榮抃舞欣歡倍百恒品所守有限不獲稱慶闕庭臣及將士官吏百姓等無任踴躍屏營之至

賀冊太子赦表

臣某言伏奉今月九日制書皇太子冊禮云覃恩與萬方同其惠澤者國慶遐宣天波曲被懷生之類咸共欣榮中賀臣聞德教所加一人有慶元良旣立萬國以貞伏惟皇帝陛下至化旁流神功廣運以爲義莫重於主鬯禮無大

於承祧考古揚前星之光順人宏少海之澤誕敷明詔宣  
告庶方雷初動於地中風已行於天下由是哀矜罪戾甄  
獎功勲表順孫孝子之門秩名山大川之祀仁無不覆惠  
無不均草木惟繇鳥獸咸若率土臣子不勝慶抃臣限守  
藩鎮不獲陪位闕庭踴躍稱慶無任屏營之至

爲監軍賀赦表

臣某言今月四日節度使伏奉制書大赦天下者渙汗大  
號滂沱鴻恩降自九天被於四海懷生之類無不慶躍中  
賀臣聞天地之大德本於生成聖人之全功在乎化育伏

惟皇帝陛下至明立極大聖統天法貞觀之宏規纂建中之盛業降哀矜於罪戾一物不遺頒寵贈於忠勤萬方皆及事遵儉約道在寬宏散作仁風灑爲膏澤率土臣下不勝歡喜臣限以監守未獲奔走稱慶闕庭不勝戀結欣戴之至謹遣某官某奉表陳賀以聞

中書門下賀赦表

臣某言伏見今日制書御丹鳳門大赦天下者明照六幽澤流九有臣等誠歡誠喜頓首頓首臣聞覆幬生成乾坤之盛德疆理化育帝王之極功伏惟睿聖文武皇帝陛下

受天元符纂聖光宅躬夏禹之勤儉體帝堯之聰明除惡  
必絕其根耀武威而四凶旣殛制政皆循其本振文教而  
百度惟貞今者東風發春元日獻歲凝旒視朝於正殿步  
輦臨御於應門開龐鴻之湛恩孚渙汗之大號萬物瞻睹  
兆人允懷至若移其放逐解網之仁也弔彼傷殘納隍之  
義也罷開市之征稅足以宏聖人厚下之風褒卿士之祖  
先足以廣聖人追遠之孝潛蟄一振槁枯盡榮普天率土  
不勝慶幸臣某等謬司樞務虔奉德音喜抃之誠倍百恒  
品無任慶躍屏營之至

賀德音表

臣某等言伏見今月二十八日制書普安羣生憂濟庶士  
每念下農艱苦賑紅粟而流衍知貪賈滯財禁青蚨之飛  
走千官聳聽萬國欽聞中賀臣聞損有餘補不足太上之  
教也歛以輕散其重哲王之制也肇自古昔垂爲憲章其  
或法因情遷事與時異則物力甚屈人心用咨是故書載  
行之惟艱史稱守而勿失伏惟睿聖文武皇帝陛下紹興  
丕圖光啟鴻業勤恤人隱精知化源以爲麥禾雖登農食  
猶歉布帛大賤女工必傷因發生之時下慈惠之詔清問



疾苦昭宣令宜嚴除暴征令已逋責首自京國達於淮湖  
三方雖遙如視以宸鑒萬幾誠眾皆經於審心自然事耕  
桑者忘四體之勤游市井者樂一朝之便慶共雲布恩隨  
風翔率土之內不勝慶幸臣等叨逢聖運預列班榮攀日  
月之光無能獻替遇雲雷之澤空荷霑濡捧戴德音不勝  
抃躍屏營之至

代鄭尚書賀冊太后禮畢赦表

臣某言伏奉五月二十八日制書皇太后光膺茂典誕受  
鴻猷恩榮慶錫覃被率土中賀臣聞天子以德教而兆人

慶賴明王以孝理而百神和平伏以皇太后秉德陰凝體  
仁坤厚宏是內則順於先朝道配軒皇之尊功參文母之  
盛伏惟皇帝陛下孝承丕緒仁嗣寶圖則天之明事地以  
察昭彰慈訓光啟尊名發德音於上元流惠澤於下土陷  
疎網者許其減等養高堂者錫以加封粟帛遍霑於耆年  
門閭必表於仁里悉使懷生庶類行道羣心非獨各親其  
所親無不長人之所長湛恩布濩盛禮豐融信可通神明  
而光四海天下臣子不勝慶幸臣限於鎮守遠在方隅不  
獲躬詣闕庭抃舞稱慶無任聳踊慶幸之至

賀老人星見表

臣某言當道進奏院狀報司天臺奏八月十五日乙亥夜老人星見於東井色黃明潤敕旨宣付所司者率土咸觀際天同慶中賀臣聞上天不言而星垂象次舍隱見其指甚明伏惟陛下道冠帝先恩覃物表太和之氣上達萬壽之瑞下呈旣在東井又當秦分色侔蒸栗光掩連珠彰爾寶圖類堯年之河出延長聖厯齊漢代之山呼凡百臣下歡心如一況臣幸霑皇屬叨守國藩瞻望闕庭不勝慶抃之至

賀白鹿表

臣某言臣得進奏院狀報中書門下奏賀於醴泉縣建陵  
柏城獲白鹿一聖敬日躋休祥薦至臣某謹按孝經援神  
龜曰王者德至禽獸則白鹿見伏惟陛下盛德配天深仁  
育物和氣交感出爲休徵懿此異獸挺茲奇表在嶠山之  
側宛是隨仙來魏闕之前如將率舞天下稱述兆人歡慶  
昔者周因征伐而獲漢自祭祀而臻比今無爲宜有慙德  
臣某幸逢昭代獲睹元功欣抃之誠倍百恒品所守有限  
不獲隨例稱慶闕庭無任屏營踴躍之至

中書門下賀白野雞表

臣某言內常侍吳承倩至宣示臣淮南節度使陳少遊所進白野雞者臣聞聖法天以調氣天表聖以呈祥皆啟迪皇猷發揮至理事均影響必在感通伏惟寶應元聖文武皇帝陛下德合太和化高前古休徵異瑞以月繫年方啟率舞以來儀豈俟重譯而作貢臣謹按瑞應圖云王者仁聖旁流四海則見又云祭祀不相踰宴會衣服有節則見耿介之性自能馴狎綽雜之姿翻然純素玉立丹檻雪映雕籠時和自叶於休祥天意實彰於變化豈越裳之獻獨

美於前王而岱宗之精用呈於今貺必然之應幽贊如斯  
載表大平之符克明柔遠之德臣謬參樞近獲覩鴻休慶  
躍之情倍萬恒品

爲百官賀白鳥表

臣某等言臣昨二十三日中書宣武軍節度使臣劉彥佐  
進白鳥并以鳥及所獻圖示百官臣某伏以殊祥絕瑞有  
應斯歸綢繆感通難識其朕惟聖德動於皇天天意勤於  
聖后則必昭彰矧嚮靈物薦臻流行葦之仁樹太平之業  
毛羽遂性禽鳥呈祥臣等中賀臣謹按孫氏圖云王者宗

金史卷之八十三  
三  
廟敬則白鳥至又漢成帝時白鳥集於文武廟黑鳥皆從  
頗類此圖去年冬十一月履端之始陛下擁萬國驅百靈  
祀園丘封天老前一日已孝享於宗廟盡敬致美竭力精  
誠悲感之音動於列辟孝敬之極通於神明白鳥之來允  
答醇至書之史冊萬代有詞觀其素彩皓潔丹雘朱躍冰  
霜奪色龜龍讓輝參五雲之嘉祥掩百王之能事臣等叨  
逢昌運累沐殊私親覩太陽之精克叶大君之祉歡躍抃  
舞手足無從不勝犬馬欣慶之至

進張祐詩冊表

凡製五言苞含六義近多放誕靡有宗師前件人久在江湖早工篇什研幾甚苦搜象頗深輩流所推風格罕及

賀劍南奏破吐蕃表

臣某言當道進奏院狀報六月某日劍南節度使韋臯狀奏破吐蕃五千餘衆生擒大酋官七人陣上殺一百五十餘人收獲牛馬四百餘頭正器械一千五百餘事者吉語遠及歡聲相接中賀臣聞順實臣道仗順者至柔而全禮爲大經無禮者雖衆必敗陛下君臨萬國天覆兆人恩覃於幽微澤及乎荒遠蠢茲蕃醜假息西陲惟天地含宏之



心未能翦滅以豺狼貪戾之性輒肆陸梁爰整其師不攻而取此皆降睿畧於天上頒明謀於閩外制士之死命得人之歡心所以殪戎如羊破虜若蝨毆彼牛馬獲其侯王威加於殊域武暢於羣動自然赤山之壤可蹈青海之波可涉必當封土刻石以垂天聲戎臣司武獲睹其慶不勝歡抃之至

賀靈武破吐蕃表

臣某言臣得朔方節度使李樂牒稱十一月二十日大破吐蕃者千里宣傳三軍快抃臣某誠歡誠喜頓首頓首臣

聞天生四夷用別荒服國有二柄誰能去兵伏惟陛下臣  
妾兆人庭衢六合溟波靜息車軌混同萬里清平三分底  
定而吐蕃羶臊醜類狂狡陰計乘陵凍草妄竊邊疆相鼠  
無牙安能穿屋羝羊羸角徒欲觸藩是以神聖啟其將心  
忠勇成於士力兵旣落於天上虜果陷於穀中箝口之馬  
僨車而繫者千蹄辮髮之人爲俘輿屍者萬指降旗載路  
棄甲滿野遙知水赤坐想風腥此皆宗社儲靈朝廷決策  
破碎戎膽振騰天威凡百人臣不勝踴躍臣某未申絲髮  
謬總旗旌欣歡憤激倍萬恒品所守有限不獲稱慶

賀修八陵畢表

臣某言得進奏院狀報八月十五日百寮於宣政殿賀修八陵畢伏惟陛下行通神明孝彰天地深懷遠慕嚴奉諸陵台階元臣展敬以祇命旬服蒸庶忘勞而陳力薙青蕪以疏徽道掃紅腐而淨藩園崇固護於岡陵增肅清於松柏漢朝充奉徒見其遷人魏時向望空聞夫作樂方今大禮彼實缺然天下臣妾不勝幸甚況臣名編竹籍屬忝葭莩感慶之誠倍百恒品

奉慰過山陵表

伏承順宗至德大聖大安孝皇帝奄過山陵率土臣庶不  
勝號慕伏惟陛下孝思天至祇事薦誠精貫昊穹禮備園  
寢攀號罔極聖情難居臣謬列藩條限於守職不獲奔走  
陪慰內庭無任感惕兢越之至

